

西域文庫·典籍編

〔清〕王樹枏等 纂修 朱玉麒等 整理

新疆圖志

上海古籍出版社

西域文庫·典籍編

〔清〕王樹枏等 纂修 朱玉麒等 整理

新疆圖志

王樹枏題



中

上海古籍出版社

新疆圖志卷三十七^[1]

祀典二

秩祀祝文

高宗純皇帝告祭博克達山文

朕恭承鴻業，撫馭寰區，康乂柔懷，中外一視。準噶爾部落向遠王化，篡弑相仍，因而內亂；達瓦齊又復殘虐其屬，分崩離析，人不聊生。雖在殊荒，均之赤子，朕何忍不爲拯救，坐視阡危。爰整王師，分道並進。今者大兵道出神境，惟神建標西域，聳峙萬山。形勢削成，光靈燁赫。尚其默相，翼我明威。期迅奏乎膚功，永牧寧夫遠服。虔申昭告，用布馨香。惟神鑒焉。乾隆二十年(1755)^[2]。

朕纘承祖緒，中外一家。順撫討逆，式昭柔遠之模；布德宣威，丕振詰戎之略。茲以西陲小丑負恩作叛，煽惑邊疆。實自外於生成，斷難寬夫勦戮。爰命定邊將軍、喀爾喀札薩克、和碩親王成衮札布，整師鞠旅，盡掃餘氛。大兵道出神境，惟神建標西域，聳峙萬山。形勢削成，光靈燁赫。尚其明昭翊應，默佑膚功。期計日以執俘，聿彰武績；用寧邊而敷化，誕擴鴻圖。敬薦馨香，惟神鑑格。乾隆二十二年。

朕繼緒丕基，輯寧函夏。遐方效順，諸部歸心。乃逆回霍集占、波羅泥都者，自我師定有伊犁，拔諸囚繫，既負辜恩之惡，尤干逆黨之誅。朕命將移兵，奉辭伐罪。頻摧衆醜，六師皆破竹而前；屢克堅城，萬里如建瓴而下。逖聽者嚮風，納降者恐後。遂械貳負之尸^[3]，獻防風之骨。弟兄駢首，申國憲於藁街；遠近傾心，撫皇輿於絕漠。纘兩朝而歲事，未五載而告功。仰賴洪庥，實資默贊。曩者大軍燮伐，宣威曾告山靈；今茲重譯歸懷，將禮用酬神貺。右享還齊於嶽瀆，西陲永奠於遐荒。薦我馨香，尚其歆格。乾隆二十五年。

謹案，博克達山在額得墨克達巴之西，天山最高峰也。乾隆二十年，討準噶爾，二十二年，追討阿睦爾撒納，大兵道出其麓，二十五年，西域平，軍旅凱旋，咸祭告。自是秩於祀典，每歲春日致祭。

歲祭博克達山文 每年春初地方官致祭^[4]

惟神作鎮西陲，效靈中土。出雲降雨，陰陽肸蠁之功；切漢憑霄，龍虎縈回之勢。邁祁連而聳秀，嘉名並《王會圖》中；指懸圃以建標，顯位在《大荒經》外。式昭有赫，永奠無疆。朕繼序重熙，敕寧六合。日月照臨之地，盡入版圖；乾坤覆載之區，悉歸亭育。萬類登諸仁壽，百神攝以懷柔。惟茲烏魯木齊，實當勝地；巴爾哈達，舊接神皋。山靈之保障斯存，境內之屏藩攸寄。幅員計里，不殊左右戶庭；屯牧如雲，遙接東西侯尉。是宜登之祀典，載在禮官。爰卜日於春初，俾定期以時享。升香瘞玉，適均列嶽之班；宣氣調神，常峙塞垣之域。式扶鰲紀，丕鞏鴻圖。用薦苾芬，惟祈歆格。

高宗純皇帝告祭額林哈畢爾噶山文

朕寅紹丕基，輯寧函夏。荷百靈之效順，美報必伸；當萬里之奏功，明禋咸秩。惟神遐荒迴峙，靈應夙昭。高埒天山，遠通月蝕^[5]。屬當逆賊阿睦爾撒納負恩狡叛，竄跡僑棲，收撫殘黎，誘招諸部，復鴟張而起事，旋蠶食以逞謀。游牧至斯，披猖寢甚，鄰近皆潛為烏合，逆酋漸欲肆螳當。已而王旅驟加^[6]，賊軍輒駭。四山草木，盡助聲威；諸嶺風雲，俱增叱咤。奔鹿遂不遑擇蔭，窮魚乃自絕游魂。雖追躡逋逃，又閱時而竣事；而摧拉枯朽，實從此以振威。信乎奉天討以出師，明神咸祐；茲者藏武功而底績，秩祀宜申。用昭右序之文，遣祠官而致享；永作西陲之鎮，鞏邊圉以敕寧。乾隆二十二年。

歲祭額林哈畢爾噶山文 每年春秋地方官致祭^[7]

惟神保障遐方，奠基西土。層巒內拱，在漠南綏靖之前；協氣遙迎，當闔外奮揚之日。逐飛廉於塞外，八公之草木皆兵；示象鼎於寰中，九牧之神奸悉化。輯寧有地，報享宜頒。朕底定荒陬，又安絕域。懷柔所及，龍堆盡列於版圖；撫馭攸加，月窟咸通於聲教。叛酋潰竄，頭屢觸於不周；勝旅先登，尸遂陳夫貳負。凡膚功之迅奏，實靈效之克彰。用奉明禋，永垂嘉典。峙金方而作鎮，著神功於華嶽以西；表翠幃以為屏，秩祀典於流沙之外。尚其出雲降雨，遠敷惠

澤於邊疆；惟茲酌醴牽牲，敬念普存於帝力。神其來格，鑒此苾芬。

謹案，額林哈畢爾噶山，在古爾班多博克山西北六十里。乾隆二十二年討阿睦爾撒納，遣官祭告。二十四年，西域平，秩於祀典，每歲春秋致祭。

歲祭木素爾山文

惟神德符艮止，位在兌維。秀甲群峰，拔地倚天之勢；靈鍾絕徼，出雲降雨之功。匹葱嶺以稱尊，洵回中之巨鎮；臨于闐而作障，允塞外之隩區。朕紹服丕基，敕寧方夏。渠搜即叙，遂犁頡利之庭；蒲海載清^[8]，遠致防風之骨。踰二萬里而獻捷，不四五年而成功。惟茲木素爾之山，實鄰阿克蘇之域。曩者六師奏凱，式彰默佑之庥；今茲百部屯田，聿顯懷柔之應。是用登之祀典，載在秩宗。練吉日以馨香，遣重臣而展告。皮懸肇舉，巍乎列嶽鎮之班；肸蠁丕昭，巋然作塞垣之固。介以繁祉，休有烈光。陳此苾芬，庶其歆格^[9]。

謹案，木素爾山在阿克蘇城北，峰巒峻拔，冰雪嵯峨，艱於行旅。自山北東北行，通伊犁。乾隆二十五年，秩於祀典，每歲春秋致祭。

高宗純皇帝告祭阿勒坦山文

朕恭承鴻業，撫馭寰區，康乂柔懷，中外一視。準噶爾部落向遠王化，篡弑相仍，因而內亂。達瓦齊又復殘虐其屬，分崩離析，人不聊生。雖在殊荒，均之赤子，朕何忍不為拯救，坐視阽危。爰整王師，分道並進。今北路大兵，道出神境，惟神起幹西北，綿亘東南。實塞外之名區，作內藩之屏障。尚期默相，翼我明威。期迅奏乎膚功，永敕寧夫遠服。虔申昭告，用布馨香。惟神鑒焉。

謹按，阿勒坦山，舊音阿爾泰，即古金山，在庫爾圖達巴西北三百里，峰巒層沓，距數百里，為北路諸山之冠，東為舊藩喀爾喀蒙古諸部，西為準噶爾部。乾隆二十年大兵討準噶爾，道出阿勒坦山，遣官祭告者^[10]。

高宗純皇帝告祭阿拉克山文

朕恭承鴻業，撫馭寰區。康乂柔懷^[11]，中外一視。準噶爾部落向遠王化，篡弑相仍，因而內亂。達瓦齊又復殘虐其屬，分崩離析，人不聊生。雖在殊荒，均之赤子。朕何忍不為拯救，坐視阽危。爰整王師，分道並進。今西路大兵道出神境，惟神雄標兌域，秀峙坤維。磅礴鍾靈，綿延西幹。尚其默相，翼我明

威。期迅奏乎膚功，永敕寧夫遠服。虔申昭告，用布馨香。惟神鑒焉。乾隆二十年。

朕續承祖緒，中外一家。撫順討逆，式昭柔遠之模；布德宣威，丕振詰戎之略。茲以西陲小丑負恩作叛，煽惑邊疆，實自外於生成，斷難寬夫勦戮。爰命定邊將軍、喀爾喀札薩克、和碩親王成衮札布，整師鞠旅，盡掃餘氛。大軍道出神境，惟神建標兌域，挺秀坤維。磅礴鍾靈，崔嵬綿亘。尚其明照翊應，默佑膚功。期計日以執俘，聿彰武績；用寧邊而敷化，誕擴鴻圖。敬薦馨香，惟神鑒格。乾隆二十二年。

謹案，阿拉克山在阿爾泰山西三百餘里，乾隆二十年大兵討準噶爾，二十二年追討阿睦爾撒納，至此皆遣官祭告。

高宗純皇帝告祭朱爾庫朱山文

朕恭承鴻業，撫馭寰區。康乂柔懷，中外一視。準噶爾部落向遠王化，篡弑相仍^[12]，因而內亂。達瓦齊又復殘虐其屬，分崩離析，人不聊生。雖在殊荒，均之赤子，朕何忍不為拯救，坐視阡危。爰整王師，分道並進。今北路大兵道出神境，惟神幹起北界，勢控西陲。雄峙邊隅，鬱為要隘。尚其默相，翼我明威。期迅奏乎膚功^[13]，永敕寧夫遠服。虔申昭告，用布馨香。惟神鑒焉。

謹按，朱爾庫朱山在烘和圖淖爾西南八十里。乾隆二十年，大兵進討準噶爾，遣官祭告者。

高宗純皇帝告祭塔爾巴哈臺山文

惟神鍾靈西徼，環鎮北庭。作屏障於龍堆，抱峰巒於烏壘。前者天兵薄伐，既梯弑之無虞；今茲土宇宏恢，宜懷柔之遍及。則途開九折，殊方永荷靈庥；而秩匹三公，展告聿隆祀典。式彰肅饗，歆格非遙。

謹按，塔爾巴哈臺山在朱爾庫朱山西北一百里，為準境北屏。乾隆三十一年，遣官祭告，自是秩於祀典，每歲春秋致祭。

歲祭塔爾巴哈臺山文 每歲春秋地方官致祭

惟神衍脈天山^[14]，效靈中土。表崇高於北徼，標形勝於西陲。夙稱邊塞之屏藩，聳重巒而特出；永作皇圖之拱衛，環疊嶂以相維。瑞靄祥氛，答四時之靈貺；升香薦幣，昭萬載之懷柔。秩祀攸隆，洪庥丕著。

高宗純皇帝告祭巴克圖山文

惟神幹連北戎，位宅西陲。秀甲群雄，表切漢凌霄之勢；靈鍾遠徼，著出雲降雨之功。枕雅爾之提封，巨防是奠；匹祁連之形勝，雄鎮爲昭。朕撫御寰瀛，輯寧函夏。殊荒在宥，興屯踰紫塞而遙；絕域歸懷，列障訖金山之外。仰名山之綿亘，臨要地之往來。壤闢膏腴，萬頃之鱗原廣布；城環險阻，千層之雉堞雲排。當土宇之遐恢，實神庥之攸賴。爰行秩祀，用展明禋。肸鬯遙通，長峙邊庭之固；皮懸肇舉，進依嶽鎮之班。行看雪嶠冰崖，同被天光之照耀；庶幾梯山棧谷，共歸王路之蕩平。薦此馨香，尚其歆格。

謹按，巴克圖山在塔爾巴哈臺城西七十里。乾隆二十二年，遣官祭告，自是秩於祀典，每歲春秋致祭。

歲祭巴克圖山文^[15] 每年春秋地方官致祭

惟神挺秀坤輿，建標兌位。嵯峨設險，奠崇基於月蝕以西；磅礴鍾靈，分大幹於天山之北。通往來於諸部，棧接梯連；壯形勢於殊方，峰層巘疊。朕八紘在闡，六宇爲家。開荒裔之土田，皆成沃壤；起大蒙之亭障，不限提封。仰承靈貺之攸昭，正值耕屯之廣布。亘千盤而積雪，暗浹溫膏；摩萬仞以干霄，同瞻巨鎮。用是登諸祀典，載在禮官。俾旅祭之以時，庶明禋之有秩。自此興雲布雨，長資亭育之功；惟茲薦醴升香，益廣懷柔之化。

歲祭阿布喇勒山文

惟神秀甲金方，勝標玉塞。崇岡起伏，從蔥嶺以分支；疊嶂峻嶒，界烏孫而作鎮。近通喀什，遠控伊犁。納喇特峙其陽，翠屏儼對；空格斯繞其左，碧水如環。緬靈爽之夙傳，宜馨香之式薦。朕丕昭武略，龕定遐荒。昧谷之西，遣亥章以測日；輪臺以外，駐戊己而開屯。乃眷名山，實稱福地。犁庭露布，久徵默佑之功；觸石雲興，允著懷柔之效。緬版章之式闢，庶沙磧之永寧。嘉貺聿臻，明禋肇舉。刊旅未詳於《禹貢》，始知際會有期；皮懸載考夫《周官》，益信報功不爽。春秋望秩，瞻峻極於北庭；風雨和甘，垂祐庥於西海。自今以始，申錫無疆。

謹案，阿布喇勒山在伊犁城正東。自乾隆二十八年秩於祀典，每歲地方官春秋致祭^[16]。

歲祭塔勒奇山文

惟神保障金方，安敦兌域。南屏拱抱，沿山之鄂博星羅；北渚回環，傍水之摩多錦簇。源泉有本，開一鑑於峰頭；煙火相望，聳孤城於遙岸。形勢冠諸絕域，典物錫以隆文。朕遠服咸賓，西戎即叙。壺漿載道，受蕃長之來降；旗鼓分馳，擒叛臣之往竄。默孚神貺，迅奏膚功。設百雉之雄關，弓懸星月；導雙流之谷口，馬飲清泉。爰錫虔懸，用申望秩。屆春秋而頒帛，慶雉譯之咸通。諏辛甲以薦馨，保鴻圖之常固。尚其昭格，永克歆承。

謹案，塔勒奇山，在博羅布爾噶蘇山西北。自乾隆二十八年秩於祀典，每歲地方官春秋致祭。

歲祭崆郭羅鄂博山文

惟神鍾靈地絡，分幹天山。南眺伊犁，與塔勒奇以並峙；西通葱嶺，鎮衛拉特以稱雄。符艮德之安敦，助宣元化；臨兌方而聳拔，夙著神威。沙暖草肥，洵真靈之秘宅；巒環谷抱，實絕域之隩區。朕拓地烏孫，洗兵魚海。單于繫頸，三捷成掃穴之助；貳負陳尸，列戍息傳烽之警。選重臣以留鎮，度沃壤以興屯。益恢一統之模，爰秩百神之祀。曩者籌邊五夜，曾識聚米之形；今茲刊旅九山，長作維屏之固。迺咨祠部，載練吉辰。典禮肇稱，薦馨香以昭格；懷柔式應，酬嶽鎮以尊崇。補山海之圖經，傳於奕禩；表渠支之疆域，綏我邊黎。用奠清樽，永垂鴻祐。

謹案，崆郭羅鄂博在博羅和洛山西。自乾隆二十八年秩於祀典，每歲地方官春秋致祭。

高宗純皇帝告祭巴爾魯克山文

惟神德符寧靜，休著崇高。壯西極之觀瞻，路通月蝕；鎮北庭之遼闊，脈接天山。昔效順於皇旅經臨，護營陣而比安磐石；今隸籍於職方紀載，奠疆圉而益固金湯。擬諸戴斗崆峒，聿昭拱衛；永藉作屏戎索，宜沛懷柔。用舉明禋，尚駢靈貺。

謹按，巴爾魯克山，在塔爾巴哈臺城南二百里。乾隆三十一年遣官祭告，自是秩於祀典，每歲春秋致祭。

歲祭巴爾魯克山文 每年春秋地方官致祭

惟神列方兌位，合鎮坤維。疊蒼翠於層巒，蔭鬱蔥之嘉木。虬枝吐秀，靈縱標太華而遙；雲葉交陰，勝蹟紀流沙之外。奠新疆而永固，保障斯存；護邊塞以垂庥，馨香特薦。尚希來格，永享明禋。

高宗純皇帝告祭格登山文

詰戎龕暴，蕲遐邇之綏安；蕩穴焚巢，荷神人之協應。乃者準噶爾以諸蕃瓦解，款塞請兵^[17]；達瓦齊以累世貫盈，負隅假息。方王師壓境，窮鱗尚恐泥蟠；而裨將選鋒，鍛羽難延株守。二十五騎自天而下，不藉梯衝；六千人無地可容，悉縻纓組。溯國威之遠暢，瞻神貺之丕昭。緬爾時呵護斯存，曾著翻營勝蹟；迄今日度懸用薦，還依表碣雄風。秩我明禋，惟神歆格。

謹按，格登山在庫隴奎山一百八十里，庫克烏蘇東七十里。山頂有高宗純皇帝《御製平定準噶爾紀功碑文》。乾隆二十五年遣官祭告，自是秩於祀典，每歲春秋致祭。

歲祭格登山文 乾隆二十五年起，地方官春秋致祭

惟神位正金方，勢崇西極。鎮準噶爾之全部，夙著靈奇；導岡底斯之群峰^[18]，丕宣氣化。職方未載，乃應運而服懷柔；王會新圖，早報功而行刊旅。崦嵫在望，報享宜誠。朕爰定遐荒，削平大漠。負陰抱陽之類，莫不尊親；出雲降雨之司，咸同覆載。惟格登山之雄峙，環伊犁河以高騫。地險爰標，神功攸懋。當奪壘擒生之日，助王族以宣威；值摩崖紀績之神^[19]，翼天庥而效順。作屏遠服，載揚赫聲濯靈；考制名山，用紀度懸典物。令先期而諏吉，俾時享以薦馨。康我邊陲，永秩春秋之祀；表茲絕域，式垂山海之經。雉譯咸通，鴻圖永固。聿將苾芬，庶克歆承。

高宗純皇帝歲祭阿勒坦額墨爾都圖山文

惟神鎮定邊隅，奠寧朔漠。東接格登之險，疊嶂岩嶢；南通莎嶺之雄，排雲峭嶠。坤元協吉，色偏應乎乾金；艮止常安，位乃居乎坎水。洵伊犁之保障，宜禋祀之優崇。朕撫恤準夷，綏來蕃部。自古職方有典，未服懷柔；於今王會新圖，如親刊旅。惟茲山之雄峙^[20]，爲絕域之殊觀。襟帶環流，束銀濤於策集；

屏藩拱列，連碧巘之和羅。特詔祠官，用頒制帛。牲牢具備，遙申遍望之誠；俎豆維馨，永著虔懸之典。神其來格，鑒此明禋。

謹案，阿勒坦額墨爾都圖山在格登山西。乾隆二十八年，秩於祀典，每歲春秋致祭。

高宗純皇帝告祭博羅圖山文

惟神體結坤輿，靈昭兌位。連峰峻峙，拔萬仞以倚天；積雪高攢，歷四時而浮玉。作花門之巨鎮，永奠西遐；界葱嶺以中維，遙通南道。朕統臨縣寓，式廓輿圖。異域歸仁，列障暨于闐之外；殊方在宥，興屯踰烏壘而遙。乃諸部之往來，仰崇山之綿亘。雖幽遐不閉，久已荷乎天庥；而梯棧無虞，實更資乎神應。用申秩祀，練時日以薦馨；敬遣專官，肇虔懸而展告。自此途開九折，共遵王路之蕩平；亦惟寒斂六花，長被春風之和煦。丕彰肸鬯，來鑒苾芬。

謹按，博羅圖山在納林奇喇山西五十里，當喀喇沙爾東北境。乾隆二十六年，遣官祭告，自是秩於祀典，每歲春秋致祭。

歲祭博羅圖山文 每年地方官春秋致祭

惟神鍾靈遐域，正宅西陲。險關蠶叢，道我武維揚之路；高踰龍阜，界殊方內屬之區。作巨鎮於回中，峰層嶂疊；通奧區於域外，棧接梯連。實惟名山，允宜嘉秩。朕八荒在闡，六合爲家。既指定乎準夷，遂全收乎回部。興屯更戍，宜安枕席以通師；駐牧游群，當順涼暄以應候^[21]。惟神庥之是賴，仰靈貺之攸昭。爰申圭幣之文，登諸祀典；更肅春秋之祭，載在秩宗。並協懷柔，宜彰肸鬯。長此冰消寒嶠，調燭被於光天；行當雪浹春膏，湛恩漸於絕徼。苾芬式薦，歆格斯承。

歲祭額彬格遜淖爾文

惟神德滋邊土，潤被遐陬。接葱嶺以環流，繞天山而表勝。澄光不秀^[22]，淵淳受衆壑之歸^[23]；湛影惟清，派合溥流泉之利。灌平原而布惠，早看沃澤興屯；通遠磧以效靈，益慶清波利涉。宜崇禋祀，用答神庥。

謹按，額彬格遜淖爾在奇喇圖魯山北二百里。自乾隆三十一年秩於祀典，每歲地方官春秋致祭。

高宗純皇帝告祭裕勒雅爾河文

惟神坤區宅奧，兌位流盈。地脈遙著夫符祥，金方亦資其靈潤。溯長流於星海，永昭作帶之功；分近派於玉河，早協洗兵之慶。久已人欣利濟，藉灌溉以開疆；自今瑞紀安瀾，並朝宗而會極^[24]。爰修祀事，用答神庥。

謹按，裕勒雅爾河即雅爾河，在額布圖河西三十里。乾隆三十一年，遣官祭告，自是秩於祀典，每歲春秋致祭。

歲祭裕勒雅爾河文 自乾隆三十二年，地方官春秋致祭

惟神德毓靈源，符標上善。妙柔明而不滓，抱清靜以無塵。遠浦渟涵，勢潏洄而似帶；晴瀾皎晶，光激灩以爲銀。值衆部之輸誠，知百靈之效順。禾麻長養，咸資布潤之功；黍稷馨香，宜有明禋之報。用昭靈貺，庶答神庥。

歲祭賽喇木淖爾文

惟神坎德宣昭，蒙泉濬發。自塔勒奇之峻嶺，靈派遙分；爲厄魯特之名川，群流交匯。晴波朗澈，作襟帶於烏孫；巨浪安平，慶澄清於蒲海。佐坤元而布化，亘沙磧以含滋。允協懷柔，宜崇昭報。朕撫綏遐徼，耆定豐功。紀績犁庭，勒石格登之障；威行破竹，洗兵伊麗之河。惟式廓之丕增，實有神之默相。當秣馬龍堆之日，效順而助皇威；泊屯田雁塞之年，流潤以滋土脈。用展浮沈之典，庶期肸鬻之通。玉帛載陳，春秋勿替。興雲有渰，萬頃溥灌溉之功；鼓枻遄行，諸蕃效朝宗之願^[25]。有感而必應，用康靖乎塞垣；源遠則流長，永馨香於奕世。式惟國典，時乃神庥。

謹案，賽喇木淖爾，在庫色木蘇克河西北，鄂拓克賽里河東南。乾隆二十八年，秩於祀典，每歲地方官春秋致祭。

高宗純皇帝告祭阿拉克圖古勒淖爾文

惟神衍派北庭，濬源西極。澤分膏雨，遍敷疏勒之田；波靜中流，近繞烏孫之壘。茲當新疆載闢，邊徼式清，爰舉明禋，用酬利濟。庶幾朝宗有慶，永資沾潤之功；從此祈報常新，益享靈長之福。

謹案，阿拉克圖古勒淖爾在布勒哈齊淖西北五十里。乾隆三十一年，遣官祭告，自是秩於祀典，每歲春秋致祭。

歲祭阿拉克圖古勒淖爾文 自乾隆三十二年，地方官春秋致祭

惟神協靈浩澤，潛潤遐荒。標名勝於月竈以西，作襟帶於天山之北。王師飛渡，瑞同蘇勒之名泉；大漠永清，廓比蒲昌之靈海。將屯衛資水泉之美，普沃新疆；而邊庭仰雲雨之司，用昭明德。爰修祀典，遙薦馨芬。

歲祭額敏河文

惟神績奏安瀾，祥符泰運。地雖臨於遠塞，派原共此朝宗^[26]。一水淵渟^[27]，流不同夫竹箭；千層激灩，風自息夫鯨波。入我版章，共九河而貢順；溉滋禾黍，普百室以胥盈。是用嘉被靈長，登之秩祀。爰答神貺，永固鴻基。

謹案，額敏河在烏里雅蘇臺河西、鄂爾和楚克河西北。自乾隆三十一年秩於祀典，每歲地方官春秋致祭。

歲祭崕吉斯河文

惟神洪源遠布，遐澤旁敷。潤西域之神皋，灌輪攸賴；隸北庭之都護，耕牧稱繁。巨嶺東來，束岡巒之蜿蜒；大河西折，作襟帶於伊犁。環沙漠以揚流，效地靈而播德。含滋有慶，命典聿昭。朕撫恤群藩，削平諸部。百靈效順，張雷庭之六師；庶彙咸通，興雲屯之千耦。惟茲巨川之利濟，實為神爽所式憑。在昔飲馬長流，澄波既慶；即今列屯濛汜，沃澤均沾。特肅祠官，載隆望祀。屆春秋而將享，丕昭漸被之庥；練時日以潔蠲，克濟柔懷之福。承茲永秩，式此居歆。

謹案，崕吉斯河自乾隆二十八年秩於祀典，每歲地方官春秋致祭。

歲祭喀什河文

惟神澤沛金方，靈昭坎德。匯特克斯而共注，衆派同歸；經固爾札以分流，平原獨沃。淵澄方折^[28]，記玉水之潏洄；績著安瀾，靜銀波之浩淼^[29]。效靈不爽，錫典宜隆。朕撫定遐陬，敕寧荒服。塞煙隴月，駐細柳以開營；雪浪風濤，挾飛鯢而競渡。惟念斯河之天險，益欽今日之波平。粵稽嘸鹿名州，益增式廓；爰布沈貍令典，用妥神明。康我邊陲，永秩春秋之祀；綏爾藩部，共歌清晏之庥^[30]。肅此苾芬，尚其昭格。

謹案，喀什河在崕吉斯河北。自乾隆二十八年，秩於祀典，每歲地方

官春秋致祭。

高宗純皇帝告祭伊犁河文

朕受命承家，化綏億域；懷神秩禮，馨格一心。爰從乙亥之春，王師申討；始達伊犁之境，時雨效靈。準人既即叙以牧寧，回部更偕來而式廓。波平兩岸，屢憑舟騎之通；派合千山，早受版章之隸。惟神嘉貺，翊我大勛。萬里而遙，久繪圖以攬勝；五年而近，常挾藻以輸誠。特崇賚帛之文，肇舉祭川之典。瑞升雲物，自今加澤編氓；功溉土田，有歲長歆國祀。浩浩崑墟之北，比於瀆尊；洋洋蒲海之東，昭茲坎德。醴牲用潔，虔告維殷。

謹案，伊犁河自乾隆二十五年西域平，遣官祭告，自是秩於祀典，每歲春秋致祭。

歲祭伊犁河文 自乾隆二十六年，地方官春秋致祭

惟神洪源遠濬，沛澤旁敷。作襟帶於兌方，朝宗有本；協盈虛於坎德，用涉咸昭。境過渠搜，遐控流沙而外；地連越匿^[31]，舊傳伊列之名。環絕域以含滋，亘平原而布潤。效靈不爽，錫典宜優。朕撫馭寰輿，牧寧荒徼。定準噶爾之全部，剝木遙通；俘厄魯特之名王，平波共慶。惟茲巨川之利濟，實當大漠之奧區。聲教所宣，懷柔悉協。在昔六師飛渡，既彰孚佑之庥；於今千耦興屯，益溥灌輸之利。爰隆秩祀，特詔祠官。頒制帛以孔虔，練吉辰而肇舉。春秋將祀，萬里宏漸被之規；牲醴薦馨，諸藩享澄清之福。尚希昭格，來饗苾芬。

歲祭察罕烏蘇河文

惟神敷澤遐方，分流絕徼。波心澄澈，鋪一片之白銀；天色空明，映千層之素練。沃壤則波羅塔拉，遙待灌輸；遠峰則哈喇古顏^[32]，茹爲環抱。圻源有自，利涉攸資。朕統馭八紘^[33]，昭宣七德。設候流沙以外，載拓堯封；洗兵瀚海之西，遠恢周索。神效靈以僉應，天助順而成功。惟茲察罕之川，近在伊犁之域。當王師之度塞，襄予宏勛；泊都護之屯田，溥茲美利。土膏滋液，應坎德以濟生民；水氣和甘，遍兌方而宣沃惠。爰稽故典，載肅常禋。奠玉幣以孔虔，練春秋而致告。吉蠲將事，列四瀆之崇班；肅饗丕昭，錫千秋之繁祉。庶幾鑒格，永祚塞垣。

謹案，察罕烏蘇河在塔勒奇河西。自乾隆二十八年秩於祀典，每歲地方官春秋致祭。

歲祭霍爾果斯河文

惟神德配玄冥，位居兌澤。播土膏之沃衍，利濟咸昭；潤絕域之奧區，盈科有漸。達洪波而遠邁，直接伊犁；匯衆派以支分，近通策集。溯靈源之溥博，錫祀典以輝煌。朕康乂西陲，蕩平朔漠。翦準噶爾之餘孽，勢失負嵎；俘渥赭特於重圍，計窮飛渡。惟神功之設險，乃小丑之削平。穹廬傳鶴唳而先驚，逆酋亡命；土馬扶風濤而具迅，王旅奮威。久修典禮於祠官，用薦馨閣於望秩。尚其昭鑒，將此苾芬。

謹案，霍爾果斯河自乾隆二十八年秩於祀典，每歲地方官春秋致祭。

歲祭阿里瑪圖河文

惟神德洽盈虛，功資灌溉。屆塔勒奇之左幹，帶水分流；環海努克之西偏，平沙交錯。涵濡嘉植，千林呈離實之英；迴抱長川，萬井沐滋培之益。地靈克效，祀事孔將。朕既續武功，用敷文命。東風受吏，聿彰懷柔之謨；溟海來王，共協安瀾之慶。緬神功之布潤，蔚物產之含滋。秋實春華，平衍溥自然之利；濟川作楫，利涉占攸往之宜。特詔祠官，祇申歲祀。錫鴻文於望秩，肅薦馨香；答靈貺於玄冥，永光俎豆。春秋勿替，昭鑒在茲。

謹案，阿里瑪圖河在伊犁河西，自乾隆二十八年秩於祀典，每歲地方官春秋致祭。

歲祭策集河文

惟神導源西極，疏派北庭。抱巖谷以奔趨，莫禦激湍之勢；溉土田而沃衍，常宏潤物之功。細浪翻銀，脈絡遙連乎察罕；長虹飲練，尾間下注乎伊犁。禹跡未通，靈境軼《大荒經》外；堯封新拓，嘉名補《王會圖》中。朕撫育寰區，牧寧邊徼。武功丕振，全收蔥嶺之河；屯政肇修，遠引蒲昌之海。惟明川之用涉，宜昭報之有加。承坤德以流甘，位兌維而布潤。往歲六軍飲馬，式彰呵護之靈；今茲重譯款關^[34]，胥受懷柔之化。爰崇明祀，特敕所司。陳瑋邸以升馨，潔彝尊而致告。澄波淼淼，永環都護之城；流水泱泱，遙繞祁連之嶂。益甄靈貺，尚鑒精誠。

謹案，策集河在伊犁河北。自乾隆二十八年秩於祀典，每歲春秋致祭。

歲祭薩瑪勒河文

惟神靈源夙著，渥澤常濡。居額蘇克之上游^[35]，衍伊犁河之別派。遙岑

北拱，萬壘雲連；大水南環，千條練瀉。亘神皋而利濟，滋絕域以含膏。奠彼迴瀾，詔茲秩祀。朕誕敷文德，式廓輿圖。稱部落於荒陬，功惟作潤；軫群黎之日用，期以飲和^[36]。惟坎功之用涉咸昭，斯戊校之開屯有藉^[37]。遣專官以致享，典肅春秋；酬靈貺而告虔，吉諏辛甲。奎屯上下，益恢聲教之隆；策集東西，共受明禋之賜。神其昭鑒，薦此椒馨。

謹案，薩瑪勒河在伊犁河北。自乾隆二十八年秩於祀典，每歲地方官春秋致祭。

歲祭奎屯河文

惟神衍派天山，導源月蝕。湛然無滓，性殊湯谷之溫；注焉不盈，德比寒泉之食。波成文而曲折，下注伊犁；水如鏡以澄明，近鄰策集。功惟潤下，勢欲朝宗。洵神應之聿昭，宜吉蠲之罔替。朕並包九寓，戡定二庭。路踰弱水之西，壬鈴遠授；地盡河源之外，戊校新屯^[38]。乃咨都護之臣，肇舉名川之祀。穿渠引水，灌溉之利攸資；剝木乘桴，濟涉之功尤遠。自古版章未闢，不登裴矩之圖；於今中外爲家，合補酈元之注。清醪載酌，制帛爰陳。康我塞垣，永作渠搜之襟帶；昭茲功德，長歆嗣歲之馨香。式薦苾芬，庶希鑒格。

謹案，奎屯河在伊犁河北，自乾隆二十八年秩於祀典，每歲地方官春秋致祭。

建威將軍楊公必耀祠祭文

曰惟公德比珪璋，心同金石。從龍旗以懋績，守烏壘以揚威。奮臂誓師，義勇壯山河之色；捐軀報國，精誠爭日月之光。專祠敕建，報功典重，禮亦宜之。茲屆，敬薦馨香。伏乞公靈，庶幾昭格。尚饗。

前都統顏札公祠祝文

曰惟公聲蜚翰苑，功立邊疆。緝武經文，倚任獨隆於北闕；整軍遏旅，餘威尚震於西陲。建三畝之祠堂，欽承詔命；享九邊之俎豆，永報元勳。茲屆仲秋，用修祀典。伏惟昭格，鑒此精虔。尚饗。

關聖帝君祝文

曰惟帝浩氣凌霄，丹心貫日。扶正統而彰信義，威震九州；完大節以篤忠

貞，名高三國。神明如在，遍祠宇於寰區；靈應丕昭，薦馨香於歷代。屢徵異蹟，顯佑群生。恭值 嘉辰，遵修祀典。筵陳籩豆，几尊牲醪。尚饗。

祭武聖曾祖光昭公、祖裕昌公、父成忠公祝文

曰惟公世澤貽庥，靈源積慶。德能昌後，篤生神武之英；善則歸親，宜享尊崇之報。列上公之封爵，錫命優隆；合三世之肇裡，典章明備。恭逢 諏吉，祇事薦馨。尚饗。

建威將軍金公祠祝文

曰惟公麟閣酬庸，自古重干城之選；鷹揚奏績，遠猷增史牒之華。朝廷追念成勞，特隆肸鬯；几席居然在上，敢昧儀型。溯自小醜跳梁，邊關告警。六師張其撻伐^[39]，一鼓聚而殲旃。維時公領雄軍，進屯斯土。豺虎聞而遠避，蚩氓賴以乂安。於是榮晉提封，且喜新開幕府。師干駢總，鼎鉉銘勛。生則旗常，沒膺俎豆。報功典重，禮亦宜之。茲屆 ，敬伸祀典。伏維昭格，鑒此微忱。尚饗。

襄勤劉公祠祝文^[40]

曰惟公勛銘帶礪，功在邊疆。馬到功成，碩望上隆於北闕；開疆拓土，餘威尚震於西陲。立專祠以表忠，欽承詔命；合因時而舉事，用報宗功。茲當 ，敬申祀典。伏惟昭格，鑒此精虔。尚饗。

祭通省忠義祠文

惟某歲次 某月 朔，越祭日，承委祭官 ，謹以羊一、豕一、酒醴、香帛、饔饌、菓品之儀，致祭于世職前任庫車辦事大臣薩公諱凌阿、前任塔爾巴哈臺參贊大臣錫公諱霖、前任葉爾羌辦事大臣武公諱仁希、前任塔爾巴哈臺參贊大臣英公諱岫之位前曰：疆場折衝^[41]，君子聽鼓鼙而有感；旗常著績，朝廷即肸鬯以報功。憶惟列公，從事邊陲，誓除外侮。爰整熊羆之隊，載驅犬鼠之群。或致果於龍堆，或狗身於虎穴。凡茲毅魄，忍缺明裡。茲當 ，恪修祀典。伏祈昭格，鑒此微忱。尚饗。

忠襄平公祠祝文^[42]

曰惟公德比珪璋，心同金石。從龍懋績，桓虎揚威。奮臂誓師，義勇壯山

河之色；捐軀報國^[43]，精誠爭日月之光。立專祠以昭忠，欽承詔命；合群賢而附祀，敬薦馨香。伏乞公靈，庶幾昭格。尚饗。

文襄左公祠祝文^[44]

曰惟公中興元老，曠代偉人。德並伊周，碩望獨資於東閣；勳隆韓范，餘威尚震於西陲。立專祠以表忠，欽承詔命；合因時而舉事，用報宗功。茲屆，敬申祀典。伏惟昭格，鑒此微虔。尚饗。

劉猛將軍祠祝文

曰惟神明昭元史，靈著聖朝。豐功隆億載馨香，祀典錫九重明詔。吞蝗懋績，爲斯民捍患禦災；洗爵明誠，遍率土春祈秋報。凡茲守土，共凜冰淵。望切豐盈，年期大有。爰陳薄奠，敬迓神庥。行看種類不遺，地無虞乎蠶食；聲靈丕著，民不歎乎鴻嗷。茲值，用將祀事。伏乞來格，鑒此微忱。尚饗。

忠介金公祠祝文^[45]

曰惟公生爲賢哲，沒作神明。本蓋世之精忠，入熙朝之祀典。手握八千子弟，度關而殺賊如麻；身擁百萬貔貅，出塞則清塵若洗。始立功於烏魯，繼駐節於伊江。祀事孔明，專祠敕建。報功典重，禮亦宜之。茲屆，敬薦馨香。伏乞公靈，庶幾昭格。尚饗。

勤肅陶公祠祝文^[46]

曰惟公勳成匡濟，德協懷柔。安邊定遠，聖主紓憂。由詞館而洊陟封圻，本文章而發爲經濟。生則旗常，歿膺俎豆。立專祠以表忠，欽承詔命；合因時而舉事，用報宗功。茲屆，敬申祀典。伏惟昭格，鑒此精虔。尚饗。

歲祭福壽山文

曰惟神聰明而一，正直無私。實邊地之屏藩，入熙朝之祀典。南承崑幹，奎壁聯而風雨以時；北接祁連，歲月增而春秋不老。福之爲言富也，寶藏時興；壽則無能明焉，地天交泰。茲值陽春之月，用修肸蠁之誠。祀事孔明，仰聲靈之赫濯；鑒觀不爽，爲民庶所皈依。敢薦苾芬，尚其歆格。